



# შირაკი

## SHIRAKI

გამოქვეყნდა 1937 წლიდან

დავით აღმაშენებლის ხეობის მუნიციპალიტეტის გაზეთი


№24 (10.080)

8-15 ივლისი, 2023 წელი

ფასი: 60 თეთრი

ყოველკვირეული გამოცემა

## არწივის ხეობის პროექტის შედეგები მოისმინეთ



დედოფლისწყაროს მუნიციპალიტეტის მერი, ნიკოლოზ ჯანიაშვილი და საკრებულოს თავმჯდომარე ნუგზარ პაპიაშვილი სასტუმრო „ავტოგრაფში“ გამართულ შეხვედრას დაესწრნენ, სადაც ვაშლოვანის დაცული ტერიტორიების მეგობართა ასოციაციამ კოლონის, არწივის ხეობისა და მის მიმდებარე ეროვნული სატყეო სააგენტოს ტერიტორიებზე განხორციელებული ეკოტურისტული ინფრასტრუქტურის პროექტის შედეგები წარადგინა.

პროექტი „ეკოტურიზმის განვითარება ბუნების ძეგლის არწივის ხეობისა და მის მიმდებარე ეროვნული სატყეო სააგენტოს ტერიტორიებზე“ 2021 წელს ინოვაციურ იდეათა კონკურსის „GreenOvation“-ის გამარჯვებული გახდა, რომელიც GIZ-ის და გარემოს დაცვისა და სოფლის მეურნეობის სამინისტროს ერთობლივი პროგრამის - ECOserve-ის ფარგლებში ჩატარდა.

პროექტი „ეკოტურიზმის განვითარება ბუნების ძეგლის არწივის ხეობისა და მის მიმდებარე ეროვნული სატყეო სააგენტოს ტერიტორიებზე“ ითვალისწინებდა საფენმავლო ბილიკის და ბუნგალოს აშენებას და ასევე საგანმანათლებლო აქტივობების განხორციელებას. 2021 წლის ამავე პერიოდში, ვაშლოვანის დაცული ტერიტორიების მეგობართა ასოციაციამ გაეროს განვითარების პროგრამის (UNDP) მცირე გრანტების კონკურსში გაიმარჯვა, რომელიც საცხენოსნო ბილიკის

და ბუნგალოს მშენებლობას ითვალისწინებდა. ორივე პროექტის გაერთიანების შედეგად, აღნიშნულ ტურისტულ ზონაში, შეიქმნა ინფრასტრუქტურა, რითიც მისი ეფექტურობა და დანიშნულების ადგილების ხელმისაწვდომობა მნიშვნელოვნად გაიზარდა.

პრეზენტაციას დედოფლისწყაროს მუნიციპალიტეტის მერთან და საკრებულოს თავმჯდომარესთან ერთად, გარემოს დაცვისა და სოფლის მეურნეობის სამინისტროს ბიომრავალფეროვნების დეპარტამენტის, ეროვნული სატყეო სააგენტოსა და დაცული ტერიტორიების სააგენტოს, ასევე GIZ და UNDP წარმომადგენლები დაესწრნენ.



## „პურის ბელელი“ გამოწვევის წინაშე

დედოფლისწყაროში ხორბლის აღება დაიწყო. სოფლის მეურნეობის სამინისტროს მონაცემებით, კახეთში მარცვლეულის აღების პროცესში 300 ერთეული კომბაინი ჩართული. მოსავლის დაბინავების ხელშეწყობისთვის კი, ფერმერების პროტესტის შემდეგ, მთავრობამ 12 ივნისიდან ფქვილის იმპორტზე დროებითი გადასახადი დაანესა, რაც 1 ტონაზე 200 ლარს შეადგენს. მთავრობა იმედოვნებს, რომ ამ გადაწყვეტილებით კონკურენტული გარემო შეიქმნება და ნისქვილკომბინატების ამუშავება მოხდება. გაზეთი „შირაქი“ დაინტერესდა, როგორია მოსავლის რაოდენობა და რა ფასად იყიდება ახალი, ადგილობრივი ხორბალი?



გაუწია ფერმერებს, მაგრამ ამ პირობებში ეს ხელშეწყობა ამინდს ვერ ქმნის.

დარგის ექსპერტების განცხადებით, აგრარულ სექტორში შექმნილი პრობლემების სათავე რუსეთ-უკრაინის ომშია. სანამ ეს ომი არ დასრულდება და ახალი ბაზარი არ მოინახება, სადაც ქართული პროდუქციის რეალიზება მოხდება, მანამდე მარტო ადგილობრივი ძალებით ამ სისტემური პრობლემების მოგვარება არ მოხდება.

„კარგია, რომ საქართველოს მთავრობამ მიიღო საკანონმდებლო ცვლილება, რომელიც ფქვილის იმპორტზე გადასახადს გულისხმობს, მაგრამ ცუდია, რომ მარცვლეულის მწარმოებელთა მეორე მოთხოვნა არ გაითვალისწინა, რაც საფურაჟე ხორბალზე დამატებითი ღირებულების გადასახადის დაწესებას ითვალისწინებდა. იმისთვის, რომ დარგი და ადგილობრივი მწარმოებლები ბოლომდე იყვნენ დაცულნი, საკანონმდებლო დონეზე უნდა მოხდეს მათი ინტერესების გათვალისწინება“ - აცხადებს გაზეთი „შირაქთან“ მარცვლეულის მწარმოებელთა ასოციაციის ხელმძღვანელი ნიკოლოზ ბენიანიძე.

დარგის ექსპერტები აღნიშნავენ, რომ რომ სასტარტო ფასი ხორბალზე ყოველთვის დაბალია და ის, შემდეგ, ეტაპობრივად იზრდება. ეს დამოკიდებულია მსოფლიოში ხორბლის მოსავლიანობაზე და, შესაბამისად, მოთხოვნა-მიწოდების ბალანსზე. ფასი საბოლოოდ მას შემდეგ დადგინდება, როცა მოსავლის აღება მთლიანად დასრულდება. გაზეთი „შირაქის“ ინფორმაციით, მარცვლეული კულტურების მოსავლის აღება დედოფლისწყაროში,

დაახლოებით, 10 დღეში დამთავრდება.

შეგახსენებთ, რომ კახელი მეხორბლეები 1 კგ ხორბლის ღირებულების სიმცირეს აპროტესტებენ. მათი თქმით, იმის ფონზე, რომ სანავისა და მექანიზაციის ხარჯები გაიზარდა, ფერმერებს ხორბლის წარმოება ძვირი უჯდებათ, ფასი კი ხორბალზე კვლავ მცირეა. შარშან ამ დროს 1 კგ. ხორბლის ფასი გაცილებით მაღალი იყო.

\*\*\*

საქართველოს ნისქვილკომბინატების ეტაპობრივ ამუშავებასთან და ადგილობრივი ხორბლის მოსავლის აღებასთან ერთად, ნისქვილკომბინატების მიერ მოსავლის მიღების პროცესი თანდათან აქტიურდება. ქართველი ფერმერების ყურადღება მიპყრობილია იქითკენ, როგორ მიმდინარეობს ხორბლის ჩაბარების პროცესი. ინტერესი ძირითადად უკავშირდება, რომელი ნისქვილები იბარებენ და რა ფასი აქვს შესაბამისი ხარისხის ხორბალს. „ხორბლისა და ფქვილის მწარმოებელთა ასოციაცია“ განცხადებს აერცვლებს:

„შესყიდვის პროცესისადმი მაღალი ინტერესიდან გამომდინარე, კიდევ ერთხელ გვინდა გავაკეთოთ განმარტება ნისქვილკომბინატების მიერ ქართული ხორბლის მიღების ორ ძირითად კომპონენტზე: ხარისხზე და ფასზე და ასევე მოსავლის შესყიდვის პროცესის გამჭვირვალობასთან დაკავშირებით.

1. **ხორბლის ხარისხი** - ხორბალი აუცილებლად უნდა იყოს სასურსათო დანიშნულების. ხორბლის ყველა პარტია, როგორც იმპორტირებული, ასევე ქართული, მოწმდება ნისქვილკომბინატების ლაბორატორიების მიერ, შეესაბამება თუ არა იგი სასურსათო ხორბლის პარამეტრებს.

ნისქვილკომბინატების მიერ ხდება მხოლოდ სასურსათო ხორბლის შესყიდვა, რეგლამენტში განწერილი ხარისხობრივი კლასების მიხედვით (სტანდარტის მიხედვით მე-3 და მე-4 კლასის ხორბალი არის სასურსათო, მე-5 კლასი და შემდგომი უკვე არის არასასურსათო ანუ საფურაჟე ხორბალი)

- ნისქვილების მუშაობის ტექნოლოგია და საქართველოს ფქვილის ტექნიკური რეგლამენტი კატეგორიულად კრძალავს ნისქვილების მიერ არასასურსათო (საფურაჟე) ხორბლის გადამუშავებას ფქვილად.

- ხორბლის ანალიზის გადამონემების შესაძლებლობა - ნისქვილში გაკეთებული ანალიზის პასუხის ერთი ეგზემპლარი ეძლევა ფერმერს. თუ ფერმერს არ აყმაყოფილებს ანალიზის პასუხი, არის ფართო შესაძლებლობა, გადამონემდეს პასუხი როგორც ჩვენი ნისქვილების სხვა ლაბორატორიებში, ასევე ათობით დამოუკიდებელ ლაბორატორიაში ქვეყნის მასშტაბით (ანუ პროცესი სრულიად გამჭვირვალეა).

2. **ხორბლის ფასი** - დღევანდელი ფასი ბაზარზე 650 ლარი/ტონის ფარგლებში მერყეობს და ფორმირებულია ანალოგიური ხარისხის საქართველოში იმპორტირებული ხორბლის ხარისხიდან გამომდინარე (საბაზისოდ ითვლება მე-3 კლასის ხორბლის პარამეტრები იქედან გამომდინარე, რომ ასოციაციის კომპანიების მიერ იმპორტირებული ხორბლის უმეტესი წილი სწორედ ამ კლასისაა).

3. **ხორბლის ჩაბარების პროცესის გამჭვირვალობა**, ფერმერების და ნისქვილკომბინატების ლია, პირდაპირი კომუნიკაცია სასურსათო ხორბლის ჩაბარების მხრივ, ჩვენთვის ძალზედ მნიშვნელოვანია.

ამიტომ, საჯაროდ ვაქვეყნებთ ასოციაციის წევრი და არაწევრი კომპანიების სიას და საკონტაქტო ტელეფონებს (სია პერიოდულად განახლდება), ასევე ვთხოვთ, ქვეყნის ფერმერულ გაერთიანებებს და ასოციაციებს, აქტიურად შეუწყონ ხელი პროცესს და აღნიშნული ინფორმაცია მიაწოდონ მათ წევრ და არაწევრ ფერმერებს, ასევე შეძლებისაგვარად მიაწოდონ ნისქვილკომბინატებს და ელევატორებს ფერმერების საკონტაქტო ინფორმაციები, რათა პროცესი და კომუნიკაცია ორივე მხრიდან აქტიური და გამჭვირვალე იყოს“.

**წინორის ნისქვილი - 599 90 83 91; ოქროს თავთავი, წნორი, წნორის ელევატორი - 591 33 63 70;**

**დედოფლისწყაროს ელევატორი - 595 18 00 44;**

**შპს წნორი - 597 98 28 98;**



# სამუშაო თათბირი მერიას

დედოფლისწყაროს მუნიციპალიტეტის მერმა ნიკოლოზ ჯანიაშვილმა მოადგილესთან, გელა სამუკაშვილთან, ადმინისტრაციულ ერთეულებში მერის წარმომადგენლებთან, სტრუქტურული ერთეულების და ა(ა)იპების ხელმძღვანელებთან ტრადიციული სამუშაო შეხვედრა ჩაატარა.

თათბირზე ნიკოლოზ ჯანიაშვილმა თანამშრომლებს ა(ა)იპ დედოფლისწყაროს მუნიციპალიტეტის კულტურის, სპორტისა და ახალგაზრდობის ცენტრისა და ა(ა)იპ კომუნალური მომსახურების ცენტრის ახალი ხელმძღვანელები **ლია მაისურაძე** და **ლუსუშ ნაკვითაშვილი** წარუდგინა და მათ

სამსახურებრივ საქმიანობაში წარმატებები უსურვა.

აღნიშნა, რომ დედოფლისწყაროში ალოობა აქტიურ ფაზაშია და მოსავლის აღება შეუფერხებლად, აგრეთვე დაცვით მიმდინარეობს.

ასევე, მერის განცხადებით, მოახლოვდა ტრადიციული სახალხო დღესასწაულის, „დედოფლისწყაროების“, აღნიშვნის თარიღი. ამ მნიშვნელოვანი დღისთვის მზადება უკვე დაწყებულია და ამჯერადაც დედოფლისწყაროელებს და დედოფლისწყაროს სტუმრებს გამორჩეული, ლამაზი ღონისძიებები ელოდება.



## მედალოსან აბიტურიენტებს მაჟორიტარმა პარლამენტში უმასპინძლა

დედოფლისწყაროსა და სავარჯიშო მუნიციპალიტეტებიდან ოქროს მედალოსანი კურსდამთავრებულები მისაღები გამოცდების წინ მაჟორიტარმა დეპუტატმა, დავით სონღულაშვილმა გაამხნევა და პარლამენტის შენობაში უმასპინძლა. ორი მუნიციპალიტეტიდან საუკეთესო მოსწავლეების ექსკურსია ორი დღის განმავლობაში მიმდინარეობდა და გამოცდების დასრულების შემდეგ დანარჩენი მუნიციპალიტეტების კურსდამთავრებულთათვისაც გაგრძელდება.

„შირაქმა“ დედოფლისწყაროელ აბიტურიენტებს შთაბეჭდილებების გაზიარება სთხოვა და ექსკურსიის დეტალებით დაინტერესდა.

**ლაშა ლეკაშვილი** (სამრეკლოს საჯარო სკოლის კურსდამთავრებული): „სხვათაშორის, პარლამენტი ისეთი სულაც არ ყოფილა, როგორც ამას მედიასაშუალებები აჩვენებენ. საკმაოდ ლალი, სამუშაო გარემო დაგვხვდა. იმაზე დიდი შენობა იყო, ვიდრე მე მეგონა. დაგვათვალისწინეს პარ-


ლამენტი, რაც ძალიან საინტერესო იყო. პირველი რიგში შეგვიყვანეს სხდომათა დარბაზში, სადაც სესიას დავესწარი. შემდეგ გვანახეს პარლამენტის თითქმის ყველა კუთხე-კუთხული და მისი ისტორია დეტალურად გაგვაცნეს. თურმე, პარლამენტი სამ ძირითად შენობადაა დაყოფილი, რაც მე პირადად აქამდე არ ვიცოდი. ჩვენთვის საინტერესო იყო ასევე, ერთ-ერთ შენობაში მოწყობილი, ექვთიმე თაყაიშვილის სახელობის პატარა მუზეუმი და იქვე იყო ყველა იმ ქართველი გმირის ისტორია, ვინც ქვეყნის განვითარებაში და გადარჩენაში წვლილი შეიტანა. ექსკურსიის დასრულების შემდეგ გაგვსაუბრა მაჟორიტარი დეპუტატი, დავით სონღულაშვილი. თითოეული ჩვენგანი პირადად გაგვიცნო და გვითხრა, რომ ბედნიერია, რადგან, რეგიონში ასეთი ნარჩინებული თაობა იზრდება. პარლამენტის წევრმა აბიტურიენტებს წარმატებები გვისურვა“.

## დასუფთავების სამუშაოები საბათლოში

გასულ თვეებში უზვი ნალექისა და გადაუდებელი წვიმების გამო, პრობლემები შეიქმნა დედოფლისწყაროს მუნიციპალიტეტის სხვადასხვა სოფლებში. როგორც სოფელ საბათლოში მერის წარმომადგენელმა კარენ მუსაელიანმა განაცხადა, ნიაღვარმა სოფლის სანიაღვრე არხები ქვიშით ამოავსო, შედეგად წვიმის წყალი გადმოდიოდა და პრობლემებს ქმნიდა.

„ადგილობრივები ვენახებში ნაცრის გაჩენაზე ჩივიან და ამას ისიც დაემატა, რომ ქვიშისგან გაიჭედა სანიაღვრე არხები და წყალი გზებზე და ვენახებში გადადის, თან მიაქვს შლამი და პრობლემებს ქმნის. მერია დაგვიპირდა, რომ ტექნიკის მობილიზებას მოახდენს და გაინმინდება ეს სანიაღვრე არხები,“ - აღნიშნავს სოფლის რწმუნებული.

გაზეთ „შირაქის“ ინფორმაციით, გრძელდება სოფლებში უზვი ნალექით გამოწვეული პრობლემების აღმოფხვრის სამუშაოები, რომლებსაც აქტიურად აწარმოებენ სოციალურად



დაუცველი ოჯახის წევრების დასაქმების პროგრამის მონაწილეები. სწორედ ასეთმა ჯგუფმა, გურჯაანის სტიქიის შემდეგ, აქტიურად დაიწყო დედოფლისწყაროს სოფლების ქუჩების განმწმინდითი სამუშაოები. სოფელ სამთაწყაროს შემდეგ სოციალურად დაუცველთა სამუშაო ჯგუფმა ამჯერად საზღვრისპირა სოფელ საბათლოს მიაშურა და ადგილობრივებს პრობლემები შეუმსუბუქა. შედეგად გაინმინდა სოფლის ცენტრალური მოედანი, გმირთა მემორიალის მიმდებარე ტერიტორია და სხვადასხვა სანიაღვრე არხები. როგორც ჯგუფის ხელმძღვანელმა **შალვა სორნაშლა** გაზეთ „შირაქს“ განუცხადა, ყველა სამუშაო შესრულდა, რისი გაკეთებაც ხელით იყო შესაძლებელი, ახლა კი ადგილობრივები მერიის ტექნიკას დაელოდებიან და დარჩენილ პრობლემებს ერთობლივი ძალებით გაუმკლავდებიან.



## №1 ბრენდის სტატუსი — „შირაქს“

2023 წლის 24 ივნისს სასტუმრო ჰოტელს & პრეფერენს ჰუალინგ თბილისში **Global Idea**-სა და **The FINANCIAL**-ის ორგანიზებით, ბიზნესის ოსკარად წოდებული ნომერ პირველი ოქროს ბრენდების რიგით მე-18 დაჯილდოების ცერემონია გაიმართა. ოქროს ბრენდი არის მთავარი ჯილდო საქართველოში წარმატებული ბიზნეს პროექტებისთვის, რომელსაც ექსპერტები და მომხმარებლები ლიად აძლევენ ხმას. წელს 62 გამარჯვებული კომპანია გამოვლინდა.

ლონისძიებას 100-ზე მეტი უმსხვილესი ქართული და უცხოური კომპანიის მენეჯერი ესწრებოდა. ოქროს ბრენდის დაჯილდოებაზე, რომელსაც ბიზნეს ოსკარსაც უწოდებენ, „შირაქი“ ყველის №1 მწარმოებელ ბრენდად დაასახელეს. დედოფლისწყაროში დაფუძნებული რძის პროდუქტების მწარმოებელი კომპანია „შირაქი“ ბაზარზე 2005 წლიდან ოპერირებს და მისი პროდუქცია დიდ ქალაქებსა და სავაჭრო ქსელებში საკმაოდ პოპულარულია.

კითხვაზე რას ნიშნავს ეს აღიარება „შირაქისთვის“? კომპანიის დამფუძნებელი ნიკოლოზ ბენიანიძე აცხადებს, რომ ეს ჯილდო არის მთელი გუნდის შრომის დაფასება და აღიარება.

„ძალიან მოხარულები ვართ, რომ „შირაქი“ ოქროს ბრენდის ჯილდოს მფლობელი გახდა. ჩვენი მთავარი პრიო-

რიტეტი, მომხმარებლის კმაყოფილებაა, რისთვისაც მუდმივად ვცდილობთ, რომ მათ უმაღლესი ხარისხის პროდუქტი და სერვისი შევთავაზოთ. ჩვენ ყოველდღიურად ვმუშაობთ იმისათვის, რომ შევქმნათ სრული ციკლი „მინდვრიდან-სუფრამდე“, რათა მომხმარებელს მივაწოდოთ უმაღლესი ხარისხის ნედლი რძის პროდუქტები.

სწორედ ამიტომ, ის ფაქტი, რომ „შირაქი“ ნომერ პირველ ბრენდად დაასახელეს როგორც მომხმარებლებმა, ასევე ექსპერტებმა, ჩვენთვის ძალიან დასაფასებელი და მოტივაციის მომცემია, „ოქროს ბრენდის“ სტატუსი კიდევ უფრო მეტს გვაძლავს.“ - აღნიშნა ნიკოლოზ ბენიანიძემ და დასძინა, რომ ამ ჯილდომ კიდევ ერთხელ დაადასტურა, რომ „შირაქი“ ნამდვილად სანდოა.

„შირაქის“ სანარმოში რძის პირველადი წარმოების სტანდარტები სრულად არის დაცული! გარდა ამისა, ორი კვირის წინ ჩვენმა კომპანიამ, შესაბამისი აუდიტის ჩატარების შემდეგ, ხარისხის დამადასტურებელი **geo gapis** სერთიფიკატი მიიღო, რაც ძალიან მნიშვნელოვანი



აღიარებაა ჩვენთვის.“ - აღნიშნა ნიკოლოზ ბენიანიძემ.

ოქროს ბრენდის დაჯილდოების ცერემონია 2006 წლიდან ტარდება და ის საქართველოში ყველაზე პრესტიჟულ და გავლენიან ბიზნეს დაჯილდოებად არის აღიარებული.

ოქროს ბრენდის ღირებულება შეუფასებელია. ის ზრდის მომხმარებლის ნდობას, აქცევს მას საერთაშორისო სავაჭრო ნიშნად, რომელსაც წარმატებით იყენებენ როგორც ქართული, ასევე საერთაშორისო ბრენდები. ოქროს ბრენ-





# ანსამბლი „ხორნაბუჯი“ ახალი ძალებით

**დედოფლისწყაროს კულტურის სახლში ვაჟთა ფოლკლორული ანსამბლის „ხორნაბუჯი“ მორიგი საანგარიშო კონცერტი გაიმართა (ხელმძღვანელი ლექსო გრემელაშვილი). ანსამბლი ახალი, მრავალფეროვანი რეპერტუარითა და შემადგენლობით წარსდგა მაყურებლის წინაშე. ახალი თაობის „ხორნაბუჯი“ ახალი ძალით და გაორმაგებული ენერჯით შეუდგა მუშაობას.**

ლონისძიება ანსამბლის ხელმძღვანელს მიჰყავდა. ლექსო გრემელაშვილმა აღნიშნა, რომ ამ ანსამბლს რვა წლის წინ შემოუერთდა და მისი მუშაობის პირველი ნაბიჯები გაიხსენა, ანსამბლის ყოფილ წევრებს კი ღვაწლისთვის მადლობა გადაუხადა.

**ლექსო გრემელაშვილი (ლოტბარი):** „მერვე წელია, ამ ანსამბლთან ვმუშაობ. მქონდა ბედნიერება, უფროსი ასაკის მომღერლებთან ერთად დამეწყო ეს საქმე. საშუალება მომეცა მათთან ერთად მემღერა და ბევრი რამ მესწავლა. ყველაფერს თავისი დრო აქვს. დროის შეჩერება ადამიანს არ შეუძლია, ამიტომაც ყველაფერს აქვს დასაწყისი და დასასრული. წინა თაობის მომღერლებმა ძალიან რთულ დროში შემოინახეს ტრადიციები. მათი ღვაწლი უმნიშვნელოვანესია. 90-იანი წლების გარდამავალ პერიოდში ქვეყანაში რთული პერიოდი იყო, ამ ქარცეცხლში გამოიარეს და დღემდე მოიტანეს ქართული სიმღერა, ეს ანსამბლი და ჩვენ გადმოგვცეს. კარგია, როცა საქმეს იწყებ და ღირსეული საქმის გამგრძელებელი ხდები. ამდენად, ჩვენ ისლა დაგვრჩენია, დიდი მადლობა ვუთხრათ თითოეულ მათგანს. დიდი მადლობა ამ

დიდი საქმისთვის, რაც წლების მანძილზე აკეთეს“.

ლონისძიებას საპატიო სტუმრების სტატუსით სტუმრობდნენ ანსამბლის ყოფილი წევრებიც – ვასილ სვიმონიშ-



ვილმა და ვასილ მაჭარაშვილმა ანსამბლს გზა დაულოცეს, საკუთარ ბიოგრაფიაზე ისაუბრეს და წარმატებები უსურვეს ახალ თაობას.

**ვასილ სვიმონიშვილი:** „კარგი სიტყვები ითქვა ამ სცენიდან. დიდი მნიშვნელობა აქვს, ანსამბლში ვინ დაგხვდება და ვისთან ერთად მოგიწევს სიმღერა. კახელი და ქიზიყელი კაცისთვის სიმღერა უცხო არ არის, რა თქმა უნდა, არც ჩემთვის იყო უცხო. ისეთ პერიოდში მიმუშავია, როცა არც პუეი იყო, არც გაზი და არც ხელფასი, თუ დაფასება. მაგრამ მაინც დიდი ენთუზიაზმით და საქმის სიყვარულით ვმღეროდი. ამ ყველაფერს 42 წელი ვემსახურე, მინდა თუ არა, ცხოვრება თავის წესებს გვკარნახობს და მომინია ანსამბლის დატოვება. მინდა, წარმატებები ვუსურვო ანსამბლს. დღეს ძალიან პერსპექტიული ახალი თაობა დავინახე ამ ანსამბლში, დიდი მომავალი აქვთ, დიდ საქმეს

უდგანან სათავეში და იმედი, წლების წინ დაწყებული ტრადიცია ღირსეულად გაგრძელდება და უფრო წარმატებული იქნება. იყო დრო, როცა სცენაზე უფრო მეტნი ვიდექით, ვიდრე დარბაზში მაყუ-

რებელი და იმედი მაქვს, ეს ყველაფერი გამოსწორდება“.

**ვასილ მაჭარაშვილი:** „1970 წლიდან ამ სცენაზე ვდგავარ, 52 წელი ანსამბლში ვავატარე. აქ რომ მოვედი, ვახტანგ



ლეკიაშვილი და ირაკლი კიკილაშვილი დამხვდნენ. შემდეგ ვასილ ტუხაშვილი შემოგვიერთდა და ასე, ნელ-ნელა დაიწყო პირველ-მეორე ხმაში სიმღერა... ხელფასები არ გვექონდა, მაგრამ მაინც გვემღერებოდა. ხშირად მოდიოდნენ მსურველები და გვეუბნებოდნენ, რესტორანს ვიკისრებთ, ოღონდ თქვენს გვერდში დაგვაცხენეთო. ყველა სხვა სამსახურები გვექონდა და მაინც ვიკრიბებოდით, ვმღეროდით. წარმატებები მინდა ვუსურვო ანსამბლ „ხორნაბუჯს“ და მადლობა ყველას მხარდაჭერისთვის.“

დედოფლისწყაროს მუნიციპალიტეტის მერიის განათლების, კულტურის, სპორტისა და ახალგაზრდობის საქმეთა სამსახურის უფროსმა **თამარ თამაზაშვილმა** მადლობა გადაუხადა ანსამბლის წევრებს და მათ ხელმძღვანელს ლექსო გრემელაშვილს განუხილეს შრომისთვის და უღამაზესი საღამოსათვის. მისი განმარტებით, ამჯერად, უფროსი თაობის მომღერლების სათანადო გაცოდება კულტურის ცენტრში მიმდინარე რეორგანიზაციის პროცესის გამო ვერ მოხერხდა. ამდენად, თამაზაშვილი აღნიშნავს, რომ სექტემბრიდან ეცდებიან ყოფილი წევრების დაფასებაზე იზრუნონ და მადლობა მრავალწლიანი შრომისთვის კიდევ ერთხელ გადაუხადონ.

ანსამბლი „ხორნაბუჯი“ კი საზაფხულო არდადეგების შემდეგ სექტემბრიდან განახლებს მუშაობას და კვლავაც ქართული ტრადიციების შენარჩუნებასა და მომავალი თაობებისთვის გადაცემაზე იზრუნებს.

## ტყის ბუნებრივი აღდგენის ხელშეწყობის პროექტი დედოფლისწყაროში

**ეროვნული სატყეო სააგენტო, კავკასიის არასამთავრობო ორგანიზაციების ქსელისა (CENN) და ბუნების დაცვის საერთაშორისო კავშირის (IUCN) თანადაფინანსებით დედოფლისწყაროში ტყის აღდგენის პროექტს განახორციელებს. სამიზნე ტერიტორიად შერჩეულია 93 ჰა დეგრადირებული მუხნარი კორომი, სადაც ტყის ბუნებრივი აღდგენის ხელშეწყობის ღონისძიებები ჩატარდება.**


როგორც ეროვნულ სატყეო სააგენტოში გაზეთ „შირაქს“ განუცხადეს, პროექტის ფარგლებში, ეროვნულ სატყეო სააგენტოს ტყის აღდგენის ღონისძიებებისთვის საჭირო 30-მდე ერთეული აღჭურვილობა და ტექნიკა გადაეცა. ასევე, დაფინანსდნენ ადგილობრივი თემის წარმომადგენლები, რომლებიც სააგენტოს მიერ მომზადებული პროექტის მიხედვით, ტყის ბუნებრივი აღდგენის ღონისძიებებში ჩაერთვებიან.

„ტყის აღდგენის ღონისძიებების მასშტაბების ზრდა სააგენტოს ერთ-ერთ მთავარ პრიორიტეტს წარმოადგენს და დღეისათვის ამის საშუალებას ჩვენს საერთაშორისო პარტნიორებთან ერთად, მოხალისეობრივი პლატფორმა „ტყის მეგობარიც“ გვაძლევს. დედოფლისწყაროში 93 ჰექტარზე მიმდინარე ტყის აღდგენის პროექტი ასეთი თანამშრომლობის კარგი მაგალითია. მნიშვნელოვანია, რომ სამუშაოებზე ადგილობრივი მოსახლეობა იქნება დასაქმებული“ – აღნიშნა ეროვნული სატყეო სააგენტოს უფროსმა, კახა ცერცვაძემ.

სატყეო სააგენტოს ტყის მოვალა აღდგენის დეპარტამენტი „შირაქს“ განუცხადეს, რომ მათთვის პრიორიტეტულია ადგილობრივი კადრების დასაქმება, ეს კი უკეთეს შედეგს იძლევა. სპეციალისტები ტერიტორიას

რამდენიმე წლის განმავლობაში დააკვირდებიან.

**გიორგი ხაბაიშვილი (ეროვნული სატყეო სააგენტოს ტყის მოვალა აღდგენის დეპარტამენტის უფროსი):** „საგაზაფხულო სამუშაოები უკვე დასრულდა, 93 ჰექტარზე ტერიტორია შეიღობა, რადგან მანამდე ის საქონლის ძოვებისგან ძალიან დეგრადირებული იყო. ტერიტორია გაიწმინდა ეკალ-ბარდისაგან, რათა შემდგომში ახალი ბუნებრივი სახეობები წამოვიდეს. გატარდა გუთანის და მინა გაფხვიერდა, რომ ამ ტერიტორიისთვის დამახასიათებელი მცენარეების ზრდას შევუწყოთ ხელი. ცხადია, ადგილობრივი მოსახლეობა დავასაქმეთ, რადგან სამუშაოების განსახორციელებლად ადამიანებს თბილისიდან არ



„ბუნებრივი გზით აღდგენილი ტყეები ბევრად კარგ შედეგს იძლევა და უფრო მდგრადია“

ვატარებდით. გარდა ამისა, ჩვენ ადგილობრივების ჩართულობის გასაზრდელად ორი მიზეზი გვაქვს: ერთი ის, რომ დასაქმებას შევუწყობთ ხელს, პარალელურად კი საკუთრების განცდას გავზრდით. როდესაც აღდგენის პროცესში ადგილობრივი მკვიდრია ჩართული, მას მეტი ინტერესი აქვს

სამუშაო ხარისხიანად შეასრულოს და ექნება განცდა, რომ რასაც აკეთებს, ეს მათია და მათი შთამომავლობისთვის კეთდება. ამჯერად, ათამდე ადგილობრივი მუშაობს. სხვა რეგიონებშიც, ყველა შემთხვევაში ადგილობრივებს ვასაქმებთ. პრაქტიკამ აჩვენა, რომ ბუნებრივი გზით აღდგენილი

ტყეები ბევრად კარგ შედეგს იძლევა და გაცილებით უფრო მდგრადია, ვიდრე ხელოვნურად. სხვა პროექტებზე გვაქვს დედოფლისწყაროში, მაგრამ ამ პროექტს რაც შეეხება, საშემოდგომო სამუშაოები კიდევ გვაქვს დაგეგმილი და იგივე პროცედურებს გავაგრძელებთ შემოდგომაზეც. შემდგომში რამდენიმე წლის განმავლობაში დავაკვირდებით ამ 93 ჰექტარიან მონაკვეთს და შევფასებთ, რა შედეგი მივიღეთ. სამუშაო ტერიტორია ლაგოდეხისილნალი-დედოფლისწყაროს სატყეო უბანშია გაერთიანებული.“

„ეკოსისტემების აღდგენის ხელშეწყობა გვალვის რისკის შემცირებისა და მედეგობის ზრდისათვის“ – პროექტს გლობალურ დონეზე IUCN-ი, აესტრიის განვითარების სააგენტოს ფინანსური მხარდაჭერით ახორციელებს.

**გვერდის მასალები მოამზადა ილია მარტყოფლიშვილმა**





# სამლოცველო სახლის როლი რწმენის უნარჩუნების საქმეში

ქალაქ დედოფლისწყაროში ერთი პატარა, რუსული ტიპის სამლოცველო სახლი დგას, ერთი შეხედვით, ვერც კი მიხვდებით, რომ აქ ეკლესია მოქმედებს. თუმცა, ამ ჭერქვეშ დიდი ისტორია და ტრადიციები ინახება. მაშინ, როცა კომუნისტური რეჟიმი ეკლესიებში ბოსლებს ხსნიდა და ფრესკებს კირით ათეთრებდა, ნითელწყაროს ამ პატარა სახლში ნირვალოცვის ხმა არასოდეს შეწყვეტილა. რეჟიმი თვალს მხოლოდ იმიტომ ხუჭავდა, რომ აქ ძირითადად რუსები მსახურობდნენ და ნირვალოცვაც რუსულ ენაზე მიმდინარეობდა.

**ვაჟა ავაშაშვილი:** „ღვთისმშობლის შობის სახელობის ეკლესია 1962 წლიდან ფუნქციონირებს 9 აპრილის ქუჩაზე, არჟანოვების ყოფილ საცხოვრებელ სახლში. სადაც ახლა ეკლესია მოქმედებს, ეს არჟანოვების პაპის საცხოვრებელი სახლი იყო, რომელთაც საკუთრება დაუთმეს ეკლესიას. მანამდე სამლოცველო სახლი ამავე ქუჩაზე №49-ში მდებარე საცხოვრებელი სახლის სარდაფში მოქმედებდა. (მე იქ მოვიხატე). მაშინ რუსი მღვდლები მოღვაწეობდნენ და მრევლიც მხოლოდ რუსებისგან შედგებოდა. შემდგომ, როდესაც მართლმადიდებლურმა ეკლესიამ 80-იანი წლების ბოლოს დაიწყო ინტენსიურად აღორძინება და ქართველი მოძღვრები დანიშნეს, ნირვალოცვის ძირითადი ნაწილი მაინც რუსულ ენაზე მიმდინარეობდა და რუსი ბებიები გალობდნენ. ის, რომ მთელი საქართველოს მასშტაბით მხოლოდ ნითელწყაროს ამ სამლოცველო სახლში არ შეწყვეტილა ნირვალოცვა, ეს რა თქმა უნდა რუსული იმპერიული პოლიტიკის არცთუ უმნიშვნელო ელემენტია. მძვინვარე ათეიზმის ეპოქაში, როდესაც ქართულ ეკლესიას ჩამორთმეული ჰქონდა ყველა უფლება და ყველა ეკლესია ან საერთოდ დაკეტილი, ან სანყობად ქცეული იყო, სწორედ მა-

შინ, ამ სამლოცველო სახლში ისმოდა უფლის დიდებისა და გალობის ხმა, აქტიურად მიმდინარეობდა ნირვალოცვა. მიუხედავად ყველაფრისა, მაინც უდაოდ პოზიტიური მომენტი იყო, რადგან ამ სამლოცველო სახლმა დიდი როლი შეასრულა რაიონსა და მთლიანად საქართველოში დაწყებული რელიგიის აღორძინების საქმეში.

გარდა ამისა, კომუნისტური რეჟიმის შედარებით რბილმა დამოკიდებულებამ ამ სამლოცველო სახლის ფუნ-



ქციონირების მიმართ მოგვცა ის, რომ თვით რუსეთიდან ბევრი საეკლესიო მოღვაწე, რომელიც იქ შევიწროვებასა და დევნას განიცდიდა, საბოლოოდ აქ ჩამოდიოდა და ნითელწყაროში მოღვაწეობდა. მაგალითად თუნდაც მამა ვიტალის დასახელებაც კმარა.

სამლოცველო სახლი ასევე საინტერესოა იმით, რომ აქ ინახება უნიკალური რუსული ხატები, რომლებიც ბოლშევიკურ ტერორს გადაურჩა და მოტანილია წმინდა პეტრეს და პავლეს ეკლესიიდან. (ამჟამად იქ ხელოვნების სკოლა მოქმედებს.) აგრეთვე, წმინდა ნიკოლოზის ტაძრიდან, რომელიც მდებარეობდა ქალაქ დედოფლისწყაროს ცენტრალურ მოედანზე, შადრევანის წინ კორპუსის ტერიტორიაზე. ტაძარი დაანგრეს 1927 წელს კომუნისტების

ბრძანებით. აქ არის ორი უნიკალური ხატი, წმინდა ნიკოლოზის და წმინდა პეტრეს და პავლეს, რომლებიც წარმოადგენს დასაკეც ტრიბუნს და ასრულებდა ე.წ. მოძრავი ეკლესიის როლს. როდესაც დიდი კავკასიური ომი მიმდინარეობდა და რომლის წინა ხაზიც სწორედ აქ, ჩვენს ტერიტორიაზე გადიოდა, რუსის ჯარში ბრძოლაში წასვლის წინ ნირვას ატარებდნენ და ჯარისკაცებს ამ ხატებთან აზიარებდნენ. ამჟამად დედოფლისწყაროს სამლოცველო სახლში ასევე ინახება მრავალი ძველი ხატი, რომელთა მნიშვნელობაც შეუფასებელია, როგორც სულიერი, ისე ხელოვნების ნიმუშის თვალსაზრისით. საყურადღებოა,

რომ 2012 წელს გაჩენილ ხანძარს ხატები გადაურჩა, მიუხედავად იმისა, რომ ძველ ხის შენობაში ცეცხლი სწრაფად გავრცელდა. ეს რელიგიური სიმნიშვნელოვანი ათეულობით წლების მანძილზე რუსმა მოქალაქეებმა დაიცვეს, შეინარჩუნეს და დღემდე მოიტანეს.“

**დეკანოზი ნიკოლოზ ლომასაძე:** „ყველა ადამიანს, რომელიც ამ სამლოცველო სახლში დადიოდა ღვანლი აქვს ამ ყველაფრის შენარჩუნებაში, რადგან ვიცით, რომ კომუნისტური რეჟიმის დროს ჩვენი ეკლესია ძალიან შევიწროვებული

იყო. ყველა ცდილობდა, რომ ეკლესიისთვის რაიმე ზიანი მიეყენებინა. არჟანოვების ოჯახი ერთ-ერთი დამცველი იყო ჩვენი სარწმუნოებისა. კონკრეტული სახელების ჩამოთვლა გამიჭირდება, მაგრამ ბევრი შემთხვევა იყო, როდესაც სინმინდებს სარდაფებში, ან სხვენში მალავდნენ და ასე ინახავდნენ. შიში არსებობდა, რომ ეს ხატები რეჟიმის წარმომადგენლებს არ გაენადგურებინათ. 1962 წელს, როცა ეს სამლოცველო გაიხსნა, ადგილობრივებმა სახლებიდან მოიტანეს და ეკლესიას შესწირეს ეს ხატები. დამალული სინმინდები საშუალოზე გამოიტანეს და შემდგომში უნიკალური ხატები სამლოცველო სახლში განთავსდა. ეს სახლები ეკლესიას დაუთმეს და სანაცვლოდ, ეკლესიაც მზრუნველობას იჩენდა ამ ოჯახის მიმართ. 2005 წლიდან მე წამოვედი უკვე ამ სამლოცველოდან და შემდეგ ახალ საკათედრო ტაძარში სისტემატიურად ვატარებდი ნირვალოცვას.“

2012 წლის 6 ოქტომბერს, საღამოს 10 საათზე სამლოცველო სახლში ცეცხლი გაჩნდა. სამლოცველო სახლში დამონტაჟებული იყო დაცვის სისტემა, რამაც განგაშის რეჟიმი დროულად აამუშავა და სახანძრო-სამაშველო სამსახურის ოპერატიულად გამოძახება მოხერხდა. სწორედ მისი წყალობით მოხდა სინმინდების გადარჩენა. ხანძრის შედეგად ძველი შენობა იმდენად განადგურდა, სპეციალისტები მის დაშლასა და ახალი ნაგებობის აშენების აუცილებლობაზე საუბრობდნენ. თუმცა, ეპარქიისთვის პრინციპულად მნიშვნელოვანი იყო სამლოცველო სახლისთვის პირვანდელი სახე მაქსიმალურად შეენარჩუნებინათ. შემონიშნულებითა და მრევლის ფიზიკური შრომით აღდგენას დიდი დრო დასჭირდა, თუმცა, მიზნის მიღწევა მოხერხდა.

ილია მარტყოფლიშვილი

## ძიუდოს ნაკრები ევროპის ჩემპიონია

ქართველი ძიუდოსტების ტრიუმფი ევროპულ ჩემპიონატზე. საქართველოს ძიუდოსტთა ნაკრებმა ევროპულ თამაშებზე ოქროს მედალი მოიპოვა, რაც იმას ნიშნავს, რომ ჩვენი ნაკრები გუნდური ისტორიაში პირველად ევროპის ჩემპიონია.

ფინალში ქართველმა ძიუდოსტებმა გერმანიას ილადა, 4:1 აჯობეს. ბრძოლები გურამ თუშიშვილ-

მა, ეთერ ლიპარტელიანმა, ლაშა შვედათუაშვილმა და ლაშა ბეჭაურმა მოიგეს. ფინალამდე შერეულმა ნაკრებმა მერვედფინალში ხორვატიის ნაკრები, მეოთხედფინალში თურქეთი, და ნახევარფინალში იტალია დაამარცხა. საქართველოს ნაკრების აქტივში ევროპულ თამაშებზე 3 ოქროს, 1 ვერცხლის და 2 ბრინჯაოს მედალია.

**ლაშა ბეჭაური:** „ძალიან ბედნიერი ვარ და ჩემთვის მხოლოდ ამ შეგრძნების გამო ღირს ყველაფერი... ცხოვრება ამაღ ღირს, რომ ჩემპიონობისთვის იბრძოლო, ქართული ჰიმნის ასაჟღერებლად ყველაფერი გააკეთო. ამჯერადაც ჩვენ ეს შევძელით, საქართველოს ძიუდოს ეროვნულმა ნაკრებმა საუკეთესო შედეგი აჩვენა, რისთვისაც ყველაფერი გააკეთეთ. ყველას დიდი მადლობა მინდა ვუთხრა გულმემატიკრობისთვის, გაბრძნებით, რომ ჩვენ კიდევ ბევრჯერ გავახარებთ ქართველ ერს. ეს ჩემი ორი ოქრო თქვენ გეძღვნება.“

პოლონეთში მესამე ევროპული თამაშები ოფიციალურად დამთავრდა. კრაკოვში, პენრიკ რეიმანის სახელობის სტადიონზე საზეიმოდ დაიხურა კონტინენტის თამაშები და „კრაკოვი-მალოპოლსკა 2023“.



### ი ყ ი დ ე ბ ა !

იყიდება ქალაქ დედოფლისწყაროს ცენტრში, ოთხ ოთახიანი ბინა 5-სართულიანი კორპუსის მე-3 სართულზე სასტუმრო „ავტოგრაფის“ წინ. ბინა არის რემონტიანი, აბაზანა-ტუალეტი კაფელ-მეტლახში, პარკეტით, ფანჯრები მეტალოპლასტმასის, შიდა კარები შეცვლილი, ორი დიდი აივნით. ბინაში რჩება სამზარეულო, გაზქურა, გაზის გამათბობელი, წყლის გამაცხელებელი, შესასვლელი კარადა, სანოლები. ფასი 25 000 \$. ტელ: 595 32 47 61; 551 31 89 76.



<b>ა მ ი ნ დ ი</b>		<b>დ ე დ ო ფ ლ ი ს წ ყ ა რ ო</b>				
ორშაბათი 10.07 დღე	სამშაბათი 11.07 ღამე	ოთხშაბათი 12.07 დღე	სუთშაბათი 13.07 ღამე	პარასკევი 14.07 დღე	შაბათი 15.07 დღე	კვირა 16.07 ღამე
☀️	☁️	☀️	☀️	☀️	☀️	☀️
31°	17°	27°	16°	28°	19°	19°

გამომცემელი შპს „შირაქი“  
 დირექტორი **ინგა შიოლაშვილი**  
 რედაქტორი **ილია მარტყოფლიშვილი**

სარედაქციო კოლეგია: ჭაჭაძე ანაბერიძე (ჟურნალისტი); ელზა ხარაშვილი (სტილისტ-მწვეფერი); ხათუნა ბენაშვილი (კორექტორი); ნათელა ბოსტაშვილი (ბუღალტერი); ნინო ჯანაშვილი (ოფის-მწვეფერი); მზია ქანდაძე (საქმის მწარმოებელი).

გაზეთი აიწყო და დაკაბადონდა „შირაქის“ კომპიუტერულ ბაზაზე. ყოველკვირეული გამოცემა იბეჭდება შპს „კოლორ პრესის“ სტამბაში.

რედაქციის მისამართი: ქალაქ დედოფლისწყარო, ფიროსმანის №18, ☎ 0 356 22 22-85; 598 72-18-72 (დირექტორი) 593 275-275 (რედაქტორი)

რეგისტრირებულია დედოფლისწყაროს რაიონის სასამართლოს მიერ, №6 014-468.  
**გაზეთის გამომწერა წელიწადში - 20 ლარი**